

**'Agenda Melayu selari agenda nasional'**  
**Malaysiakini.com**  
**October 21, 2010**

Perhimpunan Agung Umno 2010 bermula hari ini dengan majlis perasmian oleh Presiden parti Datuk Seri Najib Tun Razak di Dewan Merdeka, Pusat Dagangan Dunia Putra (PWTC) di Kuala Lumpur

Majlis dimulai dengan upacara perbarisan dan menaikkan bendera Umno di Dataran Putra pada pukul 8.30 pagi, diikuti dengan penyampaian ucapan dasar oleh Najib, yang juga Perdana Menteri, di Dewan Merdeka, di hadapan 4,907 perwakilan.

Berikut laporan langsung:

12.31pm Wakil Johor Ahmad Zahri Jamil tampil membantangkan usul bagi membahaskan ucapan dasar presiden dengan menegaskan bahawa agenda Melayu dalam apa keadaan pun tidak pernah terkeluar daripada agenda nasional.

Sambil memetik ucapan Tunku Abdul Rahman pada tahun 1970, Ahmad Zahri berkata, bentuk kerajaan ini diserahkan kepada Umno - mengikut kehendak dan hasrat parti Melayu itu sendiri.

12.00pm Setiausaha agung dan bendahari agung Umno selesai membentangkan laporan masing-masing.

11.30am Persidangan agung Umno berhenti rehat selama setengah jam setelah Najib menamatkan ucapannya sebentar tadi.

Persidangan dijadual bersambung semula pada jam 12.00 tengah hari dengan perbahasan ucapan dasar presiden.

11.10am Presiden Umno Datuk Seri Najib Razak berkata, polemik berhubung isu kerakyatan selepas merdeka dan hak istimewa orang Melayu sudah menjadi perdebatan akademik kerana ia sudah terpatery kemas.

"Seandainya mempunyai majoriti dua pertiga dalam parlimen pun, tidak mampu mengubah apa-apa jua tanpa kebenaran majlis yang dianggotai sembilan orang Raja-raja Melayu," katanya.

11.03am: Golongan yang bermain api permusuhan tidak layak digelar pemimpin, awas dengan saudagar mimpi yang menjadi petualang, kata Najib.

10.00am Najib menyampaikan ucapannya berjudul "Mendaya Bangsa, Meneraju Kemakmuran".